

四庫全書

集部

欽定四庫全書

宋元詩會卷三十四

兵部主事陳焯編

李綱

字伯紀邵武人自其祖始居無錫父夔終龍圖閣待制綱登政和二年進士自為御史時所條論即係宗社存亡弱主惑於庸輔委任不專屢進輒退以致國已安而復危功垂成而復隳百世之下考其行事跡其遇合未有不掩卷傷心者官終荆湖南路安撫大使薨年五十八贈少師謚忠定按公謫居雷州之遂溪縣有僧琮者時來周旋官僚欲見之即飄然而去蓋非凡僧也

同叔易季言遊虎丘寺邂逅何得之

理權適閩粵虎丘聊舣航霜林正搖落翠栢森成行入
門躡磴道喬木間疎篁秦帝試劍石破瓜分路傍生公
雨花臺說法今不忘蒼蘚衣峭壁枯荷響廻塘遂遊劍
池上毛髮森以張沈沈下無底疑有虬龍藏鐫削露天
巧胚胎勞混茫清竒儼圖畫祕怪叵測量薜荔疊秀色
枇杷吐幽香行行造梵宇金碧相熒煌危脊聳古殿長
腰曼脩廊憑虛架雲閣鑿險通禪房開軒俯吳會蜂窠

繚池隍列岫靄遙碧平湖湛孤光追尋殊未倦策杖登
崇岡幽獨詩句苦闔廬丘塚荒五聖瞻象設羽泉酌甘
芳西菴何閒寂脩竹自蒼蒼脫履足生繭解衣汗如漿
却攜二三子置酒白雲堂念舊已淒惻感時增慨慷况
我方遠涉狷介懷剛腸一杯且相屬世事都茫茫冠冕
志已冷山林興偏長逝將脫羈束超然傲羲皇斯遊信
清絕去去何時忘

寓瓊山遠華館一夕夢遊山間小堂松竹環合有

道士坐堂上誦李太白送人遊桃源序中有良
田名池竹果森然三十六洞別為一天之語覺
而異之今假道容惠當遊勾漏都嶠白石羅浮
皆洞天也豈神者先告將有所遇耶賦詩以紀
之

神清遂仙遊境寂恣遐躅羽人入我夢軒戶靄松竹高
吟謫仙文逸韻響金玉覺來殘燈熒懨懨猶在目歸途
歷容惠問津非素卜將遊四洞天就彼白雲宿豈無葛

稚川妙論資灌沃試求龍虎丹一使鬢毛綠斯言儻可
信長揖謝浮俗却笑昌黎翁強項寧詰曲

渡浙江

理權適桐江隨潮過漁浦山寒雪猶積江迴月初吐御
氣凌烟霄乘槎渡星渚空蒙老龍吟髣髴翠蛟舞境清
人自愁夜靜氣尤古獨坐不成眠霜晴聽津鼓

建炎行

有序千言
從省弗載

敵騎初犯闕太歲在丙午殊恩擢樞廷愧乏涓埃補兩

河未奠枕杖鉞出宣撫乞身緣謗讒竄謫旅湘淑明年
丁未夏被命尹天府頓聞環京畿四面盡豺虎金湯雖
可恃憂在人不可禦見危思致命入援秉義旅旌麾亘江
湄畏景觸隆暑忽傳元帥檄果有城破語鑾輿幸龍沙
妃后辭禁籞皇孫與帝子取索及稚乳禮文包旂裳樂
器載冀虞金繒罄公私技巧到機杼空餘宗廟存無復
薦簋簠凄凉蒼龍闕寂寞玉華廡疇能供御粟誰與獻
肥羜無從執羈勒安得生翅羽號慟絕復蘇灑淚作翻

雨繼聞宣赦書寶位登九五神明有依歸率土盡呼舞
皆言湯武姿勇智天所與向來使北營氣讐言大當戶建
牙出危城帝命纘鴻緒不然艱難中何以脫猘獮茲讐
不戴天兄弟及父母嘗膽思報吳枕薦懲在莒齊侯何
足稱勾踐不須數姬炎獲再興真人定神武願言覲行
在玉色親黻黼丹誠遂披陳祕策得宣吐謀身計雖拙
許國心獨苦片言儻有合丐骨歸壠畝飛帆過金陵鼓
枕適淮浦遙傳告大廷命相比申甫顧茲斗筭器何以

動堯禹深惟特達知感慨激肺腑如何日月光可以螢
燭助舍舟行汴堤驅車赴延佇傷心兵火餘民物亦凋
庾中使乘驛來茶藥寵賜予拜恩丘山重坐使瘵癘愈
行行近南都戈甲震金鼓將佐迎路傍往往多舊部冠
蓋如雲屯賜宴金粟園謝免徑造朝淚落濕殿礎初稱
宗社危天地同憤怒次陳國多難實啓宣光主末言樗
散材初不堪梁柱鼎顛將覆餗棖折必傾宇况茲扶顛
危正賴肱與股大舜舉臯陶小白相仲父耕莘與釣渭

端不乏伊呂惟當博詢訪考慎作心膂封章屢懇辭帝
曰莫如女往作礪與舟不復容偃偻叩額宸扆前臣敢
論偽楚易姓建大號厥罪在砧斧奈何坐廟堂乃與臣
等伍更效老獵師十事聽裁處天子亮精誠一一皆可
許因陳禦氛策用此敢予侮河外須救援屏蔽資捍拒
問誰可驅策因薦亮與所京師當一到九廟陳鼎俎却
為巡幸計不可去中寓南陽光武興形勢亦險阻西通
關陝區東與江淮距三巴及嶺海寶貨可運取據要爭

權衡黠狡謀必沮募兵益貔貅買馬增牧圉號令新幟
旗仗械飭干櫓軍容久不振整頓就規矩潢池盜弄兵
羣惡相嘯聚偏師命剪除快若猫捕鼠餘寇悉歛降分
隸歸籍簿蒐裒將帥材賞罰頗有序經營年歲間庶可
事大舉蕩氛還兩宮雪恥示千古却隆太平基不愧宗
與祖豈知肘腋間乃有椒蘭妬含沙初射影聚毒陰中
蠱規模欲破碎謀議漸齟齬固知鯁峭姿自不敵媚嫵
恨無回天力別此木中蠹安能破銅山但志然鄮塢時

危敢尸祿抗疏願引去涕泗對冕旒非不戀軒宇君臣
以義合無使赭春并帝度不可留乃聽上印組扁舟返
東吳却理梁谿艣多言更萋菲貝錦成罪罟尚荷皇天
慈薄譴居鄂渚我來雪霏霏及此歲將暮崎嶇山谷間
避寇如避弩行盡江南山始踏湖北土風烟愁浩蕩鴻
雁析儔侶沈吟白雲飛悵望黃鶴翥晴川俯漢陽葭莢
滿鸚鵡家山渺安在幽夢到別墅三年再謫官繚絡萬
里路浮游幻境中塵跡歎仰俯翠華尚蒙塵吾敢避憂

癩但嗟機會失事勢契先覩今年敵益橫春夏蹂京輔
萬騎掠秦關餘毒被陳汝五陵氣蔥蔥中原鬱撫撫棄
置不復論彌望皆莽鹵旆旆滿江淮寇抄連齊魯六飛
竟何從秋晚尚江滸何時包干戈禮瑞奠璜琥斯民安
田疇餘穀棲廩庾四方道路通舟車走商賈吁嗟呼蒼
天乃爾艱國步譬猶大厦傾著力事撐拄居然聽頽覆
此身何所措又如抱羸瘵邪氣久已痼不能親藥石乃
復甘粃膏盲骨髓間性命若絲縷安得和緩徒舉手

為摩拊馴致海宇康蒼生有環堵

哭宗留守汝霖

有序
從省

時危念人傑濟物須材雄尋常齷齪姿詎可收奇功英
英宗夫子邈與古人同抱器實磊落秉心鬱精忠影纓
仕州縣山立不妄從青松雖未高已足凌蒿蓬涉世多
齟齬失官久龍鍾擢居河朔郡烟塵正昏蒙今上在藩
邸奉使邊庭中力爭不可往高牙建元戎王室遂再造
廊廟當疇庸同朝共排媚一麾江漢東見我論世故慨

慷慨霑胸薦之守留鑰付以節制隆惠政拊疲瘵威聲
懾奸兇金湯治城塹櫓樓歛以崇出師京洛間屢挫黠
鼠鋒邦畿千里寧誇說百歲翁抗疏請還闕北伐歸兩
宮辭直志骸亮天子為動容奸諛更切齒恨未能闕弓
乃同歸巢人感憤殞厥躬皇天不慙遺吾道何其窮驂
騶竟委離冀北羣遂空梁摧大厦傾誰與扶穹隆安能
百身贖坐為四海恫人亡國殄瘁天意真惜惜中原氣
蕭瑟灑涕臨西風

張子公以圓鑑見寄作詩報之

我觀大圓鑑瑩澈靡瑕垢清光溢寒蟾碧井窺古甃氷
池絕塵埃玉壁遜好肉不知何年鑄款識雜篆籀冷然
照肝膽況燭鬚眉秀英英張子公輟贈意獨厚使我正
衣冠更以別妍陋嗟予罹百憂半世困馳驟蒼浪齒髮
衰已覺成老醜幸茲置安閒閉戶念往咎冠歌與珮落
顛倒聽襟袖平生遭謗讒白黑坐分割逝將杜德機漸
可塞智竇豈徒齊美惡端欲一昏晝鑑焉何所施無乃

虛授受聊持戲鳳匣藏此蟠螭鈕

題邵平種瓜圖

君不見伯成子高讓侯爵在野終年自耕穫下風趨問
禮徒勤俛俛田間事無落又不見於陵仲子推相位為
人灌園刈葵藿抱甕區區同漢陰不糝藜羹有餘樂古
來賢達有如此志趣未可常情度力辭富貴居賤貧凜
若霜風隕輕籜邵平本自侯東陵秦破國除休一壑當
時漢祖疑鄼侯置衛增封意非薄衆賓皆賀平獨弔一

言轉禍推先覺以茲智略佐風雲復取故封何所作歸
來種瓜青門外灌溉鋤耘甘寂寞長安之東壤尤美翠
蔓離離照城郭秋陽正熾瓜正肥解衣摘實如餽鶴兒
童玉立形骨清挈笠攜筐助操作遂令世美東陵瓜身
後高名動寥廓屠販曾聞封絳灌奴僕後來興衛霍高
鳥已盡良弓藏更有韓彭辱囚縛何如終老守瓜畦自
飽飽他真不惡龍眠也是可憐人畫此端令事如昨世
間如畫畫如夢聊為作歌資一噓

食橘

洞庭一夜天雨霜橘林綠苞朝已黃遠題書後三百顆
入手便覺秋風香黃金為膚白玉瓤沆瀣深貯甘且芳
雕盤初劈噉清露水齒乍嚼流瓊漿色香氣味紛可喜
下視衆果皆茫茫嗟余平生愛種此木奴千樹梁谿傍
只今蒿艾已埋沒豈敢向日爭熒煌蓬萊雲氣久寂寞
漢殿無復羅瀟湘厥包縱有盡酸澁剖之蠹朽安足嘗
乃知汝病是天意坐使玉食無輝光荒山乃爾飫佳品

安得騷衷置錦堂君不見杜陵野老歌病橘蕭蕭半死
誠可傷

彭蠡

神禹治水江為最遷迤逶蛇鍾作滙泓澄不獨陽鳥居
浩蕩端使羣川會羣川已會江不湍朝宗到海東南安
烟收雲斂望無際眼界始知天宇寬世傳揚瀾并左蠡
無風白浪如山起我今謫宦此中行何事恬然風浪止
陽侯也自可憐生不學世人皆世情好風已借一帆便

霽色更增雙眼明
晚來畫舸鳴六艣
超忽千山如脫兔
波心突兀見星宮
雲際崢嶸望廬阜
世間此景良不多
洞庭三峽真么麼
共浮大白期一醉
對此不飲當如何

過苦竹嶺

今日江湖境
雙眸嶺上明
山光隨地好
秋氣逼人清
隴水初分處
雲鴻欲別情
離離古來有
歎息未休兵

冬日閒居遣興

僻處掩松門
知非更念恩
庭空從鳥啁
山煖覺蜂喧
未

葉靜如掃茶花開正繁蕭條歲云暮倚杖自忘言

通衢驛夜坐有感

永夜發孤嘯起看河漢流羣山湧翠浪纖月挂瓊鉤豈
謂艱難日翻成汗漫遊虛舟今不繫暮景付滄洲

道巴陵登岳陽樓用孟襄陽韻

重湖望不極秋色靄殘陽洲渚雲沙白菰蒲霜葉黃飛
帆適沅澧迴雁過瀟湘楚客經行處依然蘭芷香

雜興

暮天來遠色行客尚貪行權急浪花碎月高雲縷輕巢
禽棲更起漁火暗還明獨寢不成夢夜寒聞雁聲

簡寂觀

陸修靜
故居

高士不可見雲鄉空舊居烟嵐飛瀑外露石禮星餘松
老來歸鶴沼深時見魚何人覓丹訣應有枕中書

善權即事

山崦溪灣三四家竹籬茅舍暮烟斜仙村自種田田玉
梅徑疑開處處花近渚水消迷浴鷺遠林烟暝數棲鷗

年年值雪長為客對此悽然感歲華

詠草

夢覺池塘碧草萋風搖烟濕已菲菲
縣聯山色不知遠惆悵王孫何日歸
微質亦知煩雨露寸心終欲報春暉
芳根縱腐猶能化舞蝶流螢到處飛

六如亭

松林葬玉近禪扃便把伽陀當勒銘
居士已亡三昧火侍兒空有六如亭
玉環約指無消息巫峽行雲更杳冥

萬法本來皆夢幻春風幾度草青青

雜興

日出霜晴鳥雀呼束裝還復戒征途黃牛傍岸將孤犢
花鴨浮溪引衆雛橋斷水寒尋野艇路迷山曲問田夫
遠遊看盡川原景待向龍津畫作圖

幔亭峯

燕罷虹橋絕世氛曾孫誰見武夷君更無裊幕空中舉
時有笙竽靜處聞猿鳥夜啼千嶂月松篁寒鎖一溪雲

洞天杳杳知何處翠石蒼崖日欲曛

次貴州

今貴縣也在粵西潯州府屬

青楓夾道鷓鴣啼古郡荒涼接島夷陸續故城依石巘
葛洪遺竈俯江湄光風冉冉吹香草烟雨濛濛濕荔枝
欲作終焉卜居計自應句偻不吾欺

自蒲圻臨湘趨岳陽道中作

屈身任道復何求去國翻成汗漫遊處世久師齊物論
攄懷聊賦畔牢愁霜清日薄寒光急雲慘天高陰氣浮

嫋嫋西風洞庭濶可堪更上岳陽樓

檳榔

疎林滄海上結實已纍纍烟濕潁虬卵風搖翠羽旗飛
翔金鸞驚掩映籜龍兒護落哈椰子勻圓訝荔枝當茶
銷瘴速如酒醉人遲蔓葉偏相稱羸灰亦漫為乍餐顏
愧渥頻嚼齒愁疲飲啄隨風土端憂化島黎

謁寇忠愍祠堂

鑿井得泉今尚美挂錢挿竹後成林精忠感動無情物

不解潛銷讒妬心

岳飛

字鵬舉相州湯陰人世力農父和行義鄉里稱厚
德飛生時有大禽若鵠飛鳴屋上因以為名未彌
月值河決水忽至母姚抱飛坐甕中衝濤及岸得
免人咸異之少負氣節沈重寡言家貧力學尤好
左氏春秋孫吳兵法生有神力未冠挽弓三百斤
學射於周同盡其術同死朔望設祭於其家父義
之曰汝若為時用殆殉國死義乎飛應募以行伍
起家累功至太尉封開國公威震遐荒紹興初年
受命北伐大功指日可成秦檜主和驟於一旦竟
坐讒死此天壤無窮之恨不待紀述而知者獨其
於詩道興至立成沈摯蒼涼駕曹景宗競病而
上世或罕見急宜采掇為懷古者助欣慨焉

鄱陽龍居寺

魏石山前寺林泉勝復幽
紫金諸佛相白雪老僧頭
潭水寒生月松風夜帶秋
我來囑龍語為雨濟民憂

池州翠光亭

愛此倚闌干誰同寓目閒
輕陰弄晴日秀色隱空山
巖樹蕭騷外征帆杳靄間
吾雖江上老心羨白雲關

寄浮圖慧海

湓浦廬山幾度秋
長江萬折向東流
男兒立志扶王室

聖主專師奠百州功業要刊燕石上歸休終伴赤松遊
丁寧寄語東林老蓮社從今著再修

池州翠微亭

經年塵土滿征衣特特尋芳上翠微好水好山看不足
馬蹄催趲月明歸

題新淦蕭寺壁

雄氣堂堂貫斗牛誓將直節報君雠憂除大敵還車駕
不問登壇萬戶侯

華嚴院

手持印杖訪黃龍舊穴空遺虎子蹤雲鎖斷巖無覓處
半山松竹撼秋風

宗澤

字汝霖義烏人自幼豪爽有大志登元祐六年進士廷對極陳時弊考官惡其直置末甲調大名館陶尉令衢州龍游改趙城令知萊州掖縣通判登州時廷議禦外失計澤曰天下自此多事矣因退居東陽山中靖康初用中丞陳過庭等列薦起知磁州磁經亂民散廩空澤繕城浚隍為固守計除河北都總管大破敵兵適康王再奉使北行澤力挽之回相州有詔以澤為副元帥從王起兵入援

屢奏奇捷自是澤兵所至敵畏如虎每請戰則廷
議目之為狂會二帝北行張邦昌僭位澤請王急
行天討數上書勸進與李綱同入對涕泗交流上
欲留澤又為黃潛善所阻以李綱薦俾守開封府
河南京西巨寇次第歸降京師復見太平因上疏
請帝急歸開封前後二十餘奏皆為汪黃等所抑
憂憤疽發於背臨死無一語及家事但呼過
河者三都人號痛後贈觀文殿學士謚忠簡

前發憤行

卿士辱多壘天王憤蒙塵禦戎要虢將謀國須雋臣百
戰取封侯未必亡其身懷姦廢忠義胡顏以為人吁嗟
世道衰大僂加搢紳平居事奔競梁汴紛雲屯一旦國

步艱四迸如星繁輔相已擇棲守令仍踰藩冠蓋陸西
竄舳艫水南奔鄙夫用慨然策馬趨修門勤王羞尺柄
悟主期片言時來倘雲龍我冠拜臨軒逶迤上玉除造
膝陳元元措世于泰寧歸來守丘樊

王黼已投遠裔而京貫未蒙顯誅慨然有作

四罪不誅舜不聖兩觀不誅魯不盛先王諱殺懼淫逞
懲一警百乃仁政滔天之罪姦臣黼儼佞無知竊魁柄
敗盟結禍致憑陵虐民斂怨仍克橫罪當薶醢賊閹貫

億萬蒼生隕其命力開湟鄯取空虛妄買燕雲稱撫定
渠魁巨蠹京其首啟亂懷姦窺我聖星文示變折狡謀
固寵招權邦以罄結盤滋蔓二十載袞繡金珠古無竝
敵兵犯闕主嬰城挈寶攜孥歛星迸黼投遠裔禦螭魅
郵置風傳士相慶貫要輿駕渡重江未嚮閭閻禍方孕
而京宴然號陳魯尚戴頭顱假視聽怨連遐裔怒西兵
曷日具聞典刑正願天亟下咫尺詔斬首以梟仍以徇
始初清明必孝治昭洗上皇仁且聖怨銷怒解各歡呼

國勢自強兵自勁

後發憤行

翁擁麾幢我為兒
剽聞竊睹皆兵機
其中襲擊不容瞬
颺行電掣猶逶迤
邊馬長驅越大河
天下震驚宮闕危
肉食之謀殊未臧
我憤切骨其誰知
慨然奏疏金馬門
力陳盟賂損國威
嚴尤下策尤可笑
鼂錯上書亦奚為
道路荆棘初剪除
花如步障吾東之
八年閉戶尺蠖屈
一旦渡關匹馬馳
行行側身聽戎捷
忽聞募士詔遣歸

濃書大墨榜教詔曰敵悔過今退師羽檄向來召貔虎
乃詠出車歌杖杜橐兵銷刃兵猶怒却把鋤犁農鼓舞
君王神武今藝祖爾賊不歸汙我斧

題獨樂園

范公之樂後天下維師溫公乃獨樂二老致意出處間
殊塗同歸兩不惡鄙夫杖藜訪公隱步無石砌登無閣
堂卑不受有美奪地僻寧遭景華拓始知前輩稽古力
晏子蕭何非妄作細讀隸碑增慷慨端正似之宜再拜

種藥作畦醫國手澆花成林膏澤大見山臺上飛塵多
高山仰止如公在

雨晴渡關 二首

燕北靜邊塵河南濯我兵風雲朝會合天地晝清明泣
涕收橫潰焦枯賴發生不辭關路遠辛苦向都城
蕩滌真成快氛霾不敢陰萬方恩澤渥二麥寵光深地
勢瞻仙掌河流識帝心馬頭迎霽色詩句日邊尋

華陰道中 二首

烟遮晃白初疑雪日暎斑斕却是花馬渡急流行小掩
柳絲如織映人家

管茅作屋幾家居雲碓風帘路不紆坡側杏花溪畔柳
分明摩詰輞川圖

至洛

都人士女各紛華列肆飛樓事事嘉政恐皇都無此致
萬家流水一城花

鄧 肅

字志宏南劍沙縣人少警敏能文美風儀善談論
李綱見而奇之相倡和為忘年交欽宗召對便殿
補承務郎授鴻臚寺簿金師圍汴肅被命詣敵營
留五十日而還張邦昌僭位肅義不屈奔走南京
擢左正言因為上言曩在金營密覘其支賞之數
不過八萬人但其信賞必罰不假文字故人各用
命今朝廷賞罰不明誰肯自勸凡朝臣受偽命者
請分三等定罪上以肅在圍城中知其姓名令分
別具奏所擬輕重上皆從之在諫垣未三月抗疏
二千言皆切至會李綱罷肅力爭忤執政落職歸
紹興二年避寇
福唐以疾卒

題梅齋

江邊蘆葦風颼颼東君一點破寒愁
牕間疎影橫春瘦

枕上冷香尋夢幽夜深竹折驚殘雪捲簾醉起千山日
洗空肺腑龍麝腥落筆天香鬪清絕

大雨

夜夜陰雲如潑墨雨勢欲挽銀河竭春工十八落泥塗
驟雨誰云不終日魏紫姚黃業已空嬉遊何足介心胃
只恐年年禾黍地浸淫盡入陽侯宮憑誰為我呼少女
掃空陰翳開天宇光風霽日暖層霄坐令六合同歌舞
龍興避難

傍山怪石如蹲虎絕頂去天無尺五却披叢棘下山腰
晶瑩照空飛紺宇道人蓬戶厭塵勞避世祇嫌山不高
那知行空老曼倩竊食當年王母桃松檜參天門晝閉
碧玉擷蔬飫炊雪百年冷坐無車音一旦偕來真惡客
當知喧寂豈殊觀出世何妨在世間能致吾人師作古
龍興今日始開山

送丹霞禪師

山壓濃陰勢欲頽阿香推車振不開君來論時風四起

挽出羲和照九坂別居八年驚電掃霜髭已失童顏好
逝者任從造物流吾人一笑初不老明朝飛錫過平津
浩歌歸耕隴上雲巖竇不應藏一滴要須化作無邊春

分歲

餘臘羈人少共歡那堪飛雪集雲端四時欲盡三更漏
六出翻成兩歲寒壓卷嶺梅殘艷薄敲殘亭竹碎聲乾
公卿休掃鬢堂下留與來朝執玉看

戲洪丞

萬里歸來雲水鄉逢春得酒且徜徉好賢誰似雙松吏
使我時終一石狂忽與高唐來鼠目却令朱戶鎖梅妝
先生取瑟吾知己安得從今不舉觴

別陳少卿

平生盃酒百無憂四海風流說太丘據景筆端凌鮑謝
當年門下得伊周那知避世欽嵒迹也許從公汗漫遊
聞說片帆今又舉三山無處著人愁

程俱

字致道衢州開化人以外祖鄧潤甫恩補吳江主簿宣和二年進頌賜上舍出身建炎中為太常少卿知秀州會高宗臨幸賜對俱所陳皆嘉納之紹興初召為祕省少監預修日厯俱撫三館舊聞比次為書名曰麟臺故事擢中書舍人兼侍講以言者罷去久之除徽猷閣待制晚病風痺有召皆力辭卒年六十七

雜興 四首

誤點成駮牛妙技有餘賞作意畫蛇足至今猶撫掌君看人間事類此或往往浩歎可奈何悠然起遐想

濯濯簷下溜刁刁樹間鳴蟲號百鳥鬧小大各有聲聲

多不留礙響振元無形何殊百千炬光影各自明

戎葵向晨照日引一尺長松栽四五年擢幹未出牆溥
溥露方晞惜此顏色芳各留一寸心試待九月霜

春鳩一何拙社燕一何巧天陰逐其婦飲啄聊自了銜
泥亦綢繆託此華厦好物生固有分巧拙均一飽

穹窿葬事回邑有感

生別萬里餘會面終有期死別不轉眸一朝千古非白
日光在天玄陰閔泉扉盈盈閨中秀土化成枯骭冠笄

共甘苦謂見素髮垂那知死生變不待桑蔭移室有病
時茵篋有嫁時衣了了眼中事閒妝靜容儀垂楊手曾
折為我當春稀迅流無迴波落英無還枝空房閒無迹
新墳草離離傷心北門道同來不同歸

送崔閒歸廬山 二首

琅琊山中水韻入三尺桐琅然醉翁操發自玉澗翁流
泉不成音寫寄十二宮醉翁不可見妙語聊形容嘗聞
三峽泉上與天漢通請君記餘響相彼玉珮風此聲倘

可繼那復有此公

吾友胡少汲結廬皖公城濶山有小隱背負紫翠屏前
臨一溪水可以濯我纓欲分青山半留我谷口耕信美
非吾鄉翩然遂宵征開君草堂處亦復占地靈虛簷倚
蒼崖下有玉澗鳴樂哉不可到因君懷友生

春日寫懷

春風遍芳華一國盡狂醉窮問獨不知但見長蒿薺秋
颺起蘋末一葉初未墜幽懷獨先覺意象已淒厲故知

春與秋初不為我計危絃自應悲寒木終易脆要之夢
中夢憂樂同一寐翻然詠軒丘心量浩無際

豁然閣

雲霞墮西山飛帆拂天鏡誰開一牕明納此千頃靜寒
蟾發澹白一雨破孤迥時邀竹林交或盡剡溪興扁舟
還北城隱隱聞鐘磬

寄開化李令光

我行阡陌間苗麥已復青茅茨間新稿雞犬有和聲不

見吏索錢田家得其生雞犬亦肥字不遭無事享於斯
可觀政豈在赫赫名父老亦相語驩然就春耕官租及
時了卒歲樂無營

自仲嘉云亡未始見夢舟行夜入吳興境有夢如
平生感而賦詩

諸人久不死而使武子先斯言太癡絕愛惡無乃偏君
看雅正情播在三百篇秦人哀三良百身寧可捐相鼠
有深刺嗟哉胡不遄此豈惑者歟加膝墜諸淵乃知孫

楚狂未必非公言

自寬吟戲效白樂天體

武陵謫九年下惠仕三已或窘如拘囚或了無愠喜吾
生憂患餘年忽及耆指偏癉未全安抱病更五禩進為
心已灰棄置甘如薺坐狂合投閒佚老宜知止向令身
安健不過如是耳每思古窮人我幸亦多矣照鄰嬰惡
疾羈卧空山裏纏綿竟不堪抱恨赴潁水文昌兩目盲
無復見天地簡編既長辭游覽永無冀吾今雖抱病蹇

曳非頓委時時扶杖行積步可數里較之卧牀席欲坐
不能起雖扶不能行懸絕安可比時從親故談亦不廢
書史右臂故依然運筆亦持七籃輿時出遊初不廢牢
醴況無他證候色脉若無異詳觀動息間儻有全安理
侍祠了無庸竊祿愧索米借居浮屠宮非村亦非市廷
堂甚爽塏高屋敞牕几郊林接溪流眼界清美嘗聞
天地間禍福更伏倚藉令衰蹇身終老只如此何須苦
嗟咨未必非受祉形如支離疏飽食逸終世目盲如宋

人全生免徭使平生歎遠遊今我在桑梓田園本家山
區處及耘耔平生困鞅掌今我恬無事寢興縱所如出
處不違已病來益尊生對境空相似永無貪欲過稍習
衛生旨不為六賊牽豈受三彭毀人言病壓身往往延
壽紀大鈞默乘除萬一理如是安全固自佳蹇廢亦可
爾死生猶寤寐況此一支體細思安否間相去亦無幾
如何不釋然萬事付疑始

夜半聞橫管

秋風夜攬浮雲起幽夢歸來度寒水一聲橫玉靜穿雲
響振疎林葉空委曲終時引斷腸聲中有千秋萬古情
金谷草生無限思樓邊斜月為誰明

望九華

船發大雲倉五十里許顧江南衆山中有數峰奇異
特異一見即知其為九華問篙人果然因知褚季野
於廣坐中識孟萬年正應如此作詩一首

卷簾對坐江南山掠眼送青來疊疊雲泉肺腸久厭飫

挂頰悠然聊復竒峰遠澹忽四五
興秀駸駸逼牕几
平生九華夢遊中一見定知真是矣
非闕目力覩天與
正覺羣山如聚米好山如人有高韻
不獨江州孟公子
直緣佳處無仕選落莫道邊同苦李
大是忘年耐久交
藜杖青鞵結終始

有美一人

三首時鄒志完在昭州曾子開在汀州陳瑩中在合浦

有美一人在昭平藕絲為衣蘭作裙
君初顧言淑且貞
直欲載以黃金輪人心變化如浮雲
明妝覺暗笑作顰

何當還之承華茵令君宴寢凝清芬

有美一人在烟汀朱顏朝滌玉壺冰素手暮理朱絲繩
語言窈窕丹鳳鳴坐持紈扇睇秋螢何當還之翡翠屏
為君把鏡整衿纓

有美一人在南浦月明採珠光照渚瑤衣被體金索纓
獨抱幽寒沫烟雨何當置之白玉宇為君歌陽春激楚

戲呈虞君明察院

暮

三仕三已心如空一壑一丘吾固窮門施雀羅正可樂

車如雞栖良不惡胸中九華初欲成綵衣玉斧雙鬟青
世間何樂復過此不失清都左右卿

初到書局以萬七千錢得一老馬盲右目戲作古

句自嘲

蹄間三尋汗流赭九達雷電爭飛灑我窮那得騁追風
正擬虺隤行果下平生畏塗飽經歷夜半臨深無馭者
故應造物巧相戲却比盲人騎瞎馬李南知音當促步
廣漢騰嘲不相假執鞭良稱塞翁兒並轡聊從杜陵夏

庖然病顙豈其類老矣問途那可捨徑煩一夫事刷秣
似桂新芻不盈把向來伯厚亦安在結駟雞棲同土苴
他年東去把撩風縱爾逍遙汴東野

罷吏客郡城滯留忽已歲暮浩然興歎

一行作吏向吳城五見姬隅上薄冰魏覲三章堪自約
殷源百尺敢言登擲楸祗送人為郡噤喟初非我負丞
鞅掌棲遲俱害性不知鬚鬢欲侵凌

謝江仲舉惠酒

山城無物可忘憂，但有平原病督郵。
知我囊中無白水，煩君若下出青州。
芳甘未謝三年醞，傲兀能消萬古愁。
會待東郊春意動，鳴鞭乘興草堂遊。

窮居苦雨

慢膚便腹轉踈慵，睡足茅簷目過鴻。
墨客縱令三尺喙，木奴何似十年功。
門前羅雀非吾病，竈底生蛙不世窮。
舊雨未乾新雨漲，可憐愁絕力田翁。

旅舍

半世江湖寄此身
冰墟何意及陽春
離騷痛飲非名士
款段還鄉亦善人
病木作花真強活
長魚沈陸恐摧鱗
清時英俊如麻葦
敢歎長年甑有塵

沈與求

字必先湖州德清人政和五年進士由明州通判
用薦除監察御史上在會稽或勸幸饒信與求請
都建康以圖恢拓復論范宗尹年少難任相位出
知台州宗尹罷再以御史召遷中丞所奏皆軍國
大計其言切直有敵以下不能堪者出為荆湖南
路安撫召除叅知政事因力贊上親征與張浚抵
牾丐祠以去復遷
知密院薨謚忠敏

夜坐感事

沈沈夜氣歸虛堂
閑深寂孤燈爇餘花
寒梧韻殘滴醞釀萬斛愁感慨一人敵
何當棄短檠陰山叱鳴鏑

夜書山驛

天寒夜向闌月出山更靜
風露搖青空萬象光耿耿
啼螢泣幽草賓鴻度前嶺
歸來坐孤牕松竹舞清影

觀網魚

暗雨垂垂梅欲黃
春山吐源春漲狂
雪鱗頰尾泝流上

吹濤噴浪能奔忙魚師布網名白大萬目井井連重網
聯艘絕流勢甚武遮羅初若無留藏大魚已得小魚棄
要使遺育充陂塘鰓鮒安用誤回避蝦蟹亦復虛跳梁
寧知不比綸索手欲以巧餌空澹浪

何子楚為范明倫賦九疑石石吾不及見也讀詩
可以知其狀吾累十峰石為小寒林興寄不淺
用其韻并及之

我弁千峰倚天碧上有脩筠材可遂月明三弄面巉巖

驚起哀猿啼峭壁兒童斲石攢青瑤寒林蕭蕭吹墮樵
坐令結習落幽夢芒屨竹杖歸路遙覺來隻影徒相守
哦子清詩筆如口眼中何必小玲瓏彷彿九疑當戶牖
神丹已失大江濤誰與安期追後塵分天隔日不可到
使我目斷蒼梧雲

劉行簡見借詩稿以長句歸之

文章偏忌聲名蚤富貴政須門第好了知二物不相關
風月膏粱兼者少劉郎天韻真不凡飛騰宜在蓬萊島

年來窮愁已到骨只有珠璣落殘稿紛紛餘子何能追
定向詩壇分六齋造物小兒亦薄相浪付繁華給揮掃
却令徑坐詩人窮只與清冷消熱惱向來狗監非同邑
渴盡文園尚傭保九原千古忽可作如君自是不枯槁
茅齋夜誦誰得聞咄咄空能訴穹昊請君更作昇天行
勿使貧兒彊知寶

溪上見梅

晴溪漲淥如陰苔晴日挿影相滌汨畫船疊鼓順流下

波光浩蕩征帆開
灘縈岸繚柁牙轉
水石互激如奔雷
須臾已復過絕壁
歸路漸近嚴陵臺
山重溪複境彌迴
暗香忽自空中來
日斜正見叢棘外
炯炯疎片飄寒梅
槎牙一種獨愁絕
含情不語明巖隈
凌波疑是水仙出
縞衣素質行徘徊
下窺深淺一笑粲
坐使凡卉俱塵埃
山谷之儒已懼甚
龜腸鶴骨世所咤
相逢頓覺百憂釋
不嫁春風誰與媒
舟行易遠空回首
角聲吹夢心悠哉

錢塘賦水母

疾風吹雨回江城，
舳舻牙嘔啞潮欲平。
客居喜無人事撓，
相與環坐臨前楹。
眼中水怪狀莫名，
出沒沙觜如浮嬰。
復如緇笠絕兩纓，
渾沌七竅俱未形。
塊然背負羣鰕行，
嗟其巧以怪自呈。
凝目懔視相將迎，
老漁旁睨笑發聲。
曰：此水母官何驚？
江流如奔絕滄瀛。
潮汐往來月為程，
藏納衆污無滿盈。
浮埃沈滓溷九清，
結成此物宜昏盲。
使鰕導迷作雙睛，
乃能接迹蚌與蜆。
亦猶巨蛭二體并，
離則無目為光精。
江天八月霜葉鳴，
罟師得鰕供水征。

水母棄擲羅縱橫試令收拾輸庖丁絳磬收涎體紆紫
飛刀鏤切武火烹花甕飪餛飩白英不殊冰盤堆水晶
稻醯齏寒芼香橙入齒已復能解醒遣漁止矣勿復評
嗟哉此性愚不更定矜故態招三彭且摩枵腹甘藜羹

到吳

三載故鄉別歸帆恰到吳食寒新火換天濶斷雲孤酒
市仍依岸漁村遠帶湖碧山千萬疊翻憶夢崎嶇

旦日趨府

紫簫吹夢斷起視斗闌干瘦馬踏殘月單衣中薄寒錦
囊那復佩革帶頓成寬浪逐官曹底聞雞敢自安

舟行即事

逗帆風借力入坐水浮光村落知多少郵亭自短長跳
魚吹暗浪浴鷺耿殘陽又是吾廬遠相看思渺茫

舟次吳松江

櫂發鱸鄉晚頻經桂子秋懶投青玉案政散黑貂裘水
落喧魚市雲微辨橘洲五湖烟浪靜誰復泛扁舟

秋懷

庭柯脫翳葉歸翼斷經過水檻清漁畧風櫓響藥羅傲
霜荷柄少團露橘叢多秋色遂如此愁城今幾何

得家書

國步猶艱棘不堪頻問家霜毛失翠葆蒿目亂玄花孤
客知時節殊方度歲華干戈就休息歸理邵平瓜

新城道中

馬蹄隨意到回首隔南岡日落鳥猶語春歸花自香殘

紅媚幽谷新綠漲回塘假榻知何地昏鐘出上方

次韻避寇

宦遊成屢卻戎壘悵頻遭聞詔趨吳會經途事董逃心
期紓國難力欲挽人豪漂泊多危涕真成失木孫

劉希顏持節按縣招維心舟中小酌次韻

故國真如寄餘生宛若浮巢鳩不護鵲池鳳肯容鷺老
木低春水孤花帶晚洲杯行應酌我知復念幽憂

即事

竹樹參差合溪流半隱扉
雨昏鳩婦鬧風急雁奴歸
策杖循沙步褰裳到石磯
遊魚吾共樂身世自依違

次韻盧憲春意

少陵花惱便顛狂天與多情付此郎
宿露園林鶯舌亂暖風庭院密脾香
閒愁幾欲縈春事幽怨還能入醉鄉
應斷玉樓雙望眼便須催促理歸樯

舟過荻塘

野航春入荻芽塘遠意相傳接渺茫
落日一竿桃葉浪

薰風十里藕花香
河回遽失青山曲
菱老難容碧草芳
村北村南歌自答
懸知歲事到金穰

過徐氏郊居

林梢渺渺墮斜暉
剥啄還來扣隱扉
門巷劣容居士屨
塵埃不到野人衣
恰當夜甑黃粱熟
盛供春山紫蕨肥
侍坐無人只山月
兩翁相對自忘機

清明

杏火燒空潑眼明
遊人蕩漿綠蕪城
山歌慣習吳歛調

水戲終含楚些聲
草滿池塘春漲淺
燕歸簾幕午風輕
踏青舊約誰能問
已喜年來粥有飴

石壁寺

山縈細路走脩蛇
峭壁連雲只蘚花
木末忽看幡影亂
馬頭初見殿陰斜
迴廊迤迤穿危嶠
側澗娟娟露淺沙
秀色可餐吾事辦
粥魚茶板莫相誇

秋日閒居

茅屋秋風斗破除
蕭騷渾似浣溪居
青山侍坐從吾好

黃帽籠頭與俗疎，賴有園官能送菜。
可無溪友解留魚，從今輒莫慚枵腹。
一飽須煩插架書。

喜次律兄見過

大扁軻輅許暫留，一樽相屬話千愁。
封胡羯末名終在，許史金張迹浪投。
遵陸漸看鴻雁集，在原當紀鶴鴒求。
他年會有相從樂，泛宅浮家萬事休。

攝尉歸安呈江嘉

無地誅鋤一束茅，清吟端作反離騷。
奔波且復同香尉。

蕭散還須似馬曹
名下吹噓初定價
暗中摹索便驚豪
文章論世寧論晚
肯慕羣飛學仰高

新春書事

蚤歲驚逢上苑春
蹇驢朝踏落花塵
只今懶問芳菲事
柳眼相看也笑人

觀瓊花

千里隋河走濁流
檣烏東下指迷樓
春風簾幕今何在
只有瓊花伴客愁


申應時尋山圖

王維買宅先成畫
申子尋山亦載圖
他日真能營小築
此山佳處著儂無

訓曾宏父 二首

小雨經旬戶不開
隔牆青子滿江梅
幽禽葉底如相識
睥睨空庭欲下來

要知春色到池塘
深院無人午夢長
已覺此身便靜樂
自溫檀火炷爐香



宋元詩會卷三十四

欽定四庫全書

集部

宋元詩會卷三十五

六

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣牛稔文

謄錄監生_臣袁繼升

欽定四庫全書

宋元詩會卷三十五

兵部主事陳焯編

高登

字彥先漳浦人少孤力學宣和間為太學生汴京被圍登與陳東等上書乞斬六賊及奪李綱兵柄再詣闕爭之欽宗即位相吳敏張邦昌將復用李邦彥登力陳為不可不報紹興初廷對直切授富川主簿尋兼賀州學事秩滿士民勾留不獲相率饋錢以助其裝登辭之不可遂買書置學宮而去召赴都堂審察上疏萬言帝覽而善之秦檜惡其譏已授靜江府古縣令縣乃檜父舊治檜生于此

郡帥胡舜陟諭當建祠登曰檜為相無狀祠不可
立舜陟大怒撫他事去登且誣以專殺之罪詔送
府獄登航海上書求納官贖罪帝憫之會有為檜
誘登往見者登不從檜怒仍送府獄幸舜陟先死
其事得白廣漕辟為歸善令又用考試策題侵檜
檜復坐以前事編管容州將置之死僅而得免謫
居授徒
以終

還山招陳希韓

乾坤莽回互日月相盪摩百年纔瞬息萬類總么麼是
身非我有造物如吾何觸事會心少幽棲發興多眷言
意所適樂此山之阿脩篁擢新幹老木榮舊柯谷聲傳

地籟松韻答天和獨石介而安寒泉淡無波園蔬掇纖
嫩名菓仍駢羅細薦著雨花碧卷受風荷隨意坐莓苔
絺衣掛薜蘿得酒即酩酊作詩共吟哦嘯長情浩蕩舞
短影婆娑妻孥鹿門趣黃綺商山歌崎嶇路辭遙迢遞
誰見過交親憶同調出處矢靡他每憐傷弓禽因感赴
燭蛾自覺此身浮相看雙鬢皤人事何時休歸來勿蹉
跎

冒寒行風雨有感

號風撼枯枿凍雨凝路塵乾坤秘日月八荒同一雲遙
知沙漠寒黯淡愁殺人天涯望不極流淚滿衣巾

中秋對月

繡江再見中秋月歲去月圓人尚缺相望千里共嬋娟
苦恨亭亭照離別今夕一樽誰與同孟光舉案對梁鴻
衆雛立侍儼成列以次持杯壽乃翁乃翁看月揩病目
手足傾頽頭髮禿但願團圓樂三十秋不計東西與南北

杜門

故人方謝客為問意如何
午枕清風足夜窗明月多
易招惟酒聖難遣是詩魔
一榻君家事何妨獨我過

夢遊故山

風際擎披鶴雲根杖策鳩
幽棲知好在歸夢故難留
山放數峰出泉分一派流
把茆何日辦縛屋護松楸

送元泰

但得身長健何妨鬢已華
胸藏惟錦繡筆走是龍蛇
作掾只三語讀書空五車
卷懷已良計去去卧煙霞

水漲謝邑宰送米

心知一字不堪煮
矻矻窮年黃卷中
食粥由來未為拙
儲瓶况乃嗟屢空
令君好賢婉韓愈
賤子受賜慙盧仝
春水從教遶舍北
癡兒寧復啼門東

乞米

臣饑欲死侏儒飽
方朔誰憐是歲星
館下諸生笑豐腹
江頭漁父諄獨醒
魯公已作乞米帖
陶令旋尋儲粟餅
親舊依然眼相向
故應特地為吾青

小源欲歸

潮頰香醪暈醉紅鞵敲歸路勒青驄水涵萬頃曾孫稼
月逗盈衿少女風大誤平生緣画足無聊中夜祇書空
擬將方寸難論事直扣天門問化工

夜行道中

黃茆時節瘴煙濃人在山凹第幾重梁竦負才徒感慨
嵇康賦性本疎慵此生自斷天休問吾道當年世不容
會脫幘巾還舊隱鹿門妻子慣相從

九日

塞雁南飛度戍樓一聲天地有餘秋
家連滄海難窮目人在蠻荒欲盡頭
莫効涓埃裨國計況無毫髮為身謀
所須菽水能多少踪跡飄然不繫舟

歐陽澈

字德明崇仁人年少負氣慷慨談時事不少屈其憂國憫時出于天性靖康初上禦敵十策既又論列十事皆不報高宗即位徒步走行在上封事極詆用事大臣為黃潛善所殺

重遊寥陽洞有感

尋真曾到寥陽殿小立廊腰花影轉飛瓊仙子下瑤臺
淖約雲鬟眼波剪水沈煙斷一簾秋醉睡海棠紅玉軟
武陵歸去採年華揚州夢覺江波遠重來風物恰依然
愛日融融素煙卷洞門寂歷鎖長春異木槎枒挿天半
霞衣冉冉媚東風綠鎖窗前重識面酒酣春筍理琵琶
曲終依約含幽怨人間名利幾時休馬蹄不駐空留戀
桃花流水古猶今回首碧雲人不見

秋試下即事有感寄國鎮

籬菊金英噴異香
杜門岑絕獨持觴
風掀脫葉橫斜舞
雲襯平林淺淡黃
塞管有情增哽噎
野花無緒伴淒涼
不禁景物撩秋眼
剩與新篇付錦囊

戲促朝宗酒約

雨收雲海湧金盆
簾捲香絲破篆紋
雙陸無心酬白壁
十千有約醉紅裙
哦詩誤許聯師服
載酒真當過子雲
待遣秋娘呈妙舞
春山已把水沈薰

陳欽若時寓盤龍作詩寄之

凜凜冰霜嚼齒牙沈沈清夜詠簷花
摩雲氣逸干星斗落帝詞妍帶綺霞
醉掃麝煤奔渴驥困紆象管引秋蛇
擬尋紅樹賡詩社却日揮戈不許斜

歸途遣興借朝宗韻簡敦仁

緩著歸鞭水石鄉息鞍箕踞小橋傍
煙滋竹葉雙叢玉秋著蘆花一岸霜
潑眼溪山增爽氣襲人蘭蕙破幽香
擬提吟筆扛洪鼎反笑蚍蜉不自量

謝人惠紫竹杖

王猷珍重惠龍孫策險扶危價莫論
爛醉縣錢過酒肆
狂吟步月打僧門
虛心尚有凌雲操
勁節元無染淚痕
應向香山居士道
朱藤雖好未為尊

臨川戲留友人

山童澤涸欲金流
小雨廉纖陡變秋
河朔飲徒方快意
鱸魚歸興不如休
歌姝況有飛瓊侶
結客當為擲菓遊
一曲陽關腸斷盡
未應聞此不遲留

和子賢夏日晚望

溪山潑墨水雲秋似綺餘霞次第收
燦燦拒霜鋪蓼岸
雙雙屬玉舞蘋洲
杳無錦字來憑雁
擬滅機心試狎鷗
望裏碧雲還又合
數峰江上忍凝眸

洪皓

字光弼鄱陽人少有奇節負經畧四方志登政和
五年進士王黼朱勔皆欲婚之力辭宣和中為秀
州司錄拯水災活十數萬人攝寧海令黜貧弱四
千八百戶稅時號洪佛子建炎三年充北庭通問
使至彼被執其副使龔璣竟事劉豫公節愈厲致
窘辱百端移太原遷雲中逆冷山金大臣有烏舍
者延公訓子而衣食不給宴如也淹留十五年放
歸高宗欲大用之又以忤秦檜通判饒州責濠州

團練安置英州徙南雄卒年六十八謚忠宣有文集五十卷子迺遵邁皆以文學致顯仕蓋忠義之報云

奉使留金金臣烏舍求詩口占漫答

久持使節傍門庭薄命猶賒五鼎烹
羝乳何心占北海鴈書隨夢到京城
莫言地廣頻修怨應念民勞早戢兵
國寶善鄰君寶信坐膺難老見昇平

向子諲

字伯恭臨江人敏中玄孫欽聖憲肅皇后再從姪也元符三年用后復辟恩補承奉郎三遣知開封

府歷京畿轉運副使建炎之亂康王次濟州子諲
遣助軍費張邦昌使其甥劉達齎手書通問子諲
焚書不啟因械繫劉達于獄中力請康王率諸將
渡河出其不意以救二帝遣江淮發運以素善李
綱為黃潛善所惡斥知襄慶府道梗不得行紹興
元年移鄂州主管安撫荆湖東路單騎入賊營諭
降被執俄釋回詔提舉江州太平宮再除戶部侍
郎因潘良貴叱其奏對煩瀆上怒良貴而子諲亦
與同貶及和議起力排之
忤秦檜致仕卒年六十八

題王文孺臞菴

仙翁五十鬢猶青高卧柴門晝亦扃茅舍已忘鐘鼎夢
蒲輪休過薜蘿亭陰森門巷先生柳寂寞江天處士星

晚歲田家農事了閒抄甯戚相牛經

陳與義

字去非洛人兒時即能作文登政和三年上舍甲
科官教授遷太學博士高宗南遷避亂轉徙召為
兵部員外郎歷翰林學士知制誥紹興七年拜叅
知政事惟思用道德以輔朝廷尊主威正綱紀丞
相趙鼎每于上前陳恢復之論與義必助之無何
出知湖州遂請祠卒年四十九所賦墨梅詩最為
徽宗所賞云

休日早起

隴隴窗影來稍稍禽聲集開門知有雨老樹半身濕劇

讀了無味遠遊非所急蒲團著身寬安取萬戶邑開鏡
白雲度捲簾秋光入飽受今日間明朝復羈縻

夜步堤上

旋買青芒屨去踏沙頭月爭教冠蓋地著此影突兀樹
寒栖鳥動風轉孤管發月色夜夜佳人生事如髮夢中
續清遊濃露濕銀闕

連雨書事

九月逢連雨蕭蕭穩送秋龍公無乃倦客子不勝愁雲

氣昏城壁鐘聲咽寺樓年年授衣節牢落向他州

寒食

草草隨時事蕭蕭傍水門濃陰花照野寒食柳圍村客
袂空佳節鶯聲忽故園不知何處笛吹恨滿清樽

雨

沙岸殘春雨茅簷古鎮官一時花迸淚萬里客憑欄日
晚薔薇重樓高燕子寒惜無陶謝手盡可破憂端

雨中

北客霜侵鬢南州雨送年未聞兵革定徒使歲時遷古
澤生春靄高空落暮鳶山川含萬古鬱鬱在樽前

將次葉城道中

荒野少人跡竹輿伊軋聲晴雲秋更白野水暮還明寂
寞信吾道淹留諳物情王喬有餘舄借我一東征

宿資聖院閣

暮投山崦寺高處絕人羣遠岫林間見微泉舍後聞閣
虛雲亂入江濶野橫分欲與僧為記今年懶作文

道中寒食 二首

飛絮春猶冷，離家食更寒。
能供幾歲月，不辦了悲歡。
刺史葡萄酒，先生苜蓿盤。
一官違壯節，百慮集征鞍。

斗粟淹吾駕，浮雲笑此生。
有詩酬歲月，無夢到功名。
客裏逢歸雁，愁邊有亂鶯。
楊花不解事，更作倚風輕。

岸幘

岸幘立清曉，山頭生薄陰。
亂雲交翠壁，細雨濕青林。
花落客心碎，鳥啼春意深。
窮鄉愁節換，時得一閒吟。

別呂伯恭

樽酒相逢地江楓欲盡時猶能十日客共出數年詩供
世無筋力驚心有別離好為南極柱深慰旅人悲

聳王道濟陷賊

海內堂堂友如今在賊圍虛傳表蓋脫不見華元歸浮
世身難料危途計易非雲孤馬息嶺老涕不勝揮

立春雨

衡山縣下春日雨遠映青山絲樣斜容易江邊欺客況

分明沙際濕年華竹林路隔生新水古渡船空集亂鴉
未暇獨憂巾一角西溪當有續開花

清明

雨晴閒步澗邊沙行入荒林聞亂鴉寒食清明驚節序
暖風遲日醉梨花書生投老王官谷壯士偷生漂母家
不用鞦韆與蹴鞠只將詩句答年華

龍門

未到龍門十載彊斷崖依舊立斜陽金銀佛寺浮佳氣

花木禪房接上方
羸馬乍來還竟去
流鶯多處最難忘
老僧不作留人意
看水看山白髮長

雨晴

天缺西南江面清
纖雲不動小灘橫
牆頭語雀衣猶濕
樓外殘雷氣未平
盡取微涼供穩睡
急搜奇句報新晴
今宵絕勝無人共
卧看星河盡意明

眼疾

天公嗔我眼常白
故置昏昏阿堵中
不怪參軍騎瞎馬

但妨中散送飛鴻著離令惡誰能對損讀方奇定有功
九惱從來為佛種會知那律證圓通

秋夜

中庭淡月照三更白露澄空河漢明莫遣西風吹葉盡
却愁無處著秋聲

清明

街頭女兒雙髻鴉隨蜂趁蝶學妖邪東風也作清明節
開偏來禽一樹花

芙蓉洲

殘年不復徙他邦
長與兩禪同夜缸
坐到更深都寂寞
雪花無數落天窗

牡丹

一自黃沙入玉關
十年伊洛路漫漫
青墩溪畔龍鍾客
獨立東風看牡丹

汪藻

字彥章饒州德興人
幼穎異入太學中
進士第由婺州推官遷江西
提舉學事徽宗親製
君臣慶會

閣詩惟藻和篇稱最時胡仲亦有文名人為之語
曰江左二寶胡仲汪藻遷著作佐郎與王黼不合
罷去欽宗即位三遷為起居舍人高宗以中舍召
時次揚州藻多陳奏宰相黃潛善惡之出主宮觀
明年復召用拜翰林學士帝親書白團扇紫詰仍
兼綰黃麻似六經十字賜之自是詔令多出其手
紹興二年出知湖州六年詔賜史館餐錢聽辟所
屬就纂日歷八年上所修書六百六十五卷升顯
謨閣學士以言者奪職
居永州二十四年卒

古鏡行

我有辟邪鏡得之咸陽宮其陰為天池一母將九龍旁
書負圖字土蝕如旋蟲緘以駭雞珍妙極倖之工清光

照遠近千里秋毫空豈不鑒脂澤所貴肝膽通問誰為
此器太古非人功客聞重歎息意欲窺靈蹤高臺不辭
倚恐客難稱容繩窮匣半啟四室來悲風日車當晝留
羞澁如頑銅森然髮上指凜若臨霜鋒我還撫客手此
豈世寶同揮淚兩無言掩鏡鞶囊中

避地函亭野步

今日幸無雨天空出遙岑行行不知疲遂至春江潄汲
路轉籬落人家在桑陰平疇漲清波隴麥如人深溝畎

戲鳬驚新蒲映浮沈我生本樵漁對此諧初心景物豈
不好悲來自難任風塵暗中原四海如驚禽黃屋狩萬
里兩宮隔辰參龍移螻螳窺月晦蟾蜍侵宇宙有傾覆
茲遊豈嶮嶮銷憂賴濁醪太息誰能斟

庚午歲屏居零陵

暑退潦亦收瀟湘淨如染時觀自跳魚衝破青琬琰纖
纖初弦月不受薄雲掩近村應漸寒已有鴉數點

桃源行

祖龍門外神傳壁方士猶言仙可得東行欲與羨門親
咫尺蓬萊滄海隔那知平地有青雲只屬尋常避世人
關中日月空萬古花下山川長一身中原別後無消息
聞說瓜分因感昔誰教晉鼎判東西却愧秦城限南北
人間萬事愈可憐此地當時亦偶然何事區區漢天子
種桃辛苦望長年

過吳明叟新居

誰開大屋沈沈者門外垂楊拂車馬主人四十持節歸

高卧綠陰啼鳥下冥冥一徑傍花入忽有清池照深夏
魚吹落日知鏡淨荷受微風看珠瀉夫君少多湖海氣
欲騁驂駟無地跨故將能事驚世人坐向雲端差萬瓦
稍培幽桂出窗前時放青山來竹罇人言此興極不淺
天遣公忙那肯暇要須便作輞川圖他日思歸聊對画
阻風雨辟邪渡寄王仲成

渡頭急雨鳴森木木杪顛風飛大屋沒膏寒水稻生芽
滿眼青泥車折軸山行值雨舟值風窮愁日日煩天公

不如歸卧澗壑底世事一掃春煙空別君兩年重此別
喜君胸次渾冰雪擬將身作賈胡留無奈事如空鳥滅
挽我不回君怒嗔交情把握成參辰相隨百里還相見
只有西山似故人

過臨平 二首

一別九霄路風煙長滿衣已成身老大無復世輕肥天
濶鳥雙下山寒人獨歸曉來何事雨春水半巉扉

睡起涼生岸鉤簾坐小窗麥風能起枕梅雨不鳴江往

事心長折歸途影自雙依然蒲柳地不待早秋降

次韻向君受感秋

且欲相隨苜蓿盤不須多問沐猴冠菊花有意浮杯酒
桐葉無聲下井欄千里江山漁笛晚十年燈火客氈寒
男兒幾許功名事華髮催人不少寬

醉別李高侍郎

疇昔追隨翰墨場功名今日愧劉郎英姿合上凌煙閣
巧譖曾遭偃月堂雙槩又乘清夜去一樽聊發少年狂

歸來却共燈花語
騎省看成滿鏡霜

書寧州驛壁

過眼空花一餉休
坐狂猶得佐名州
雖遭灑吏嗤韓子
却喜溪神識柳侯
盡日野田行擺輦
有時雲嶠聽鉤輈
會將新濯滄浪足
踏遍千巖萬壑秋

晚發吳城山

風埽陽侯雪陣平
雨催摩詰畫圖成
氣吞浦溆重林盡
秋著江湖去鳥明
厚祿故人無一字
長年三老伴餘生

會須滿意開懷抱到眼廬山不世情

李彌遜

字似之蘇州吳縣人登大觀三年進士調單州司戶權編修以封事劄切廢斥八載靖康初知瑞州徙知饒州以召對首奏勘亂大計排斥奸言帝嘉其諫直欲留之為時相所忌知吉州紹興七年遷起居郎論事益鯁切無所避和議起胡銓范如圭曾開以忤秦檜相繼貶逐彌遜復抗爭之檜大怒嗾言官論彌遜與趙鼎王庶同沮和議落職十餘年卒朝廷思其忠節追復敷文閣待制有詩十卷

同天隱少章遊嵩山懷元明

秦公我輩士早踏翰墨場萬言若投石十年猶枯囊苦

欲泛江海有親在高堂牢落京華春門無一壺漿長鞭
策瘦馬送我古道傍憐我值險艱赤心寫摧傷鏗鏘五
字句勢與鵬鷗翔感此坐矯首星星鬢成蒼西風小搖
落雨洗煙嵐光嶂曉露孤秀野陰栖暗芳更攜鮑謝流
履盡千巖霜搜奇得幽深訪古到渺茫月落潭影空清
吟殊未央緬懷紫芝宇百憂繞迴腸三歎已晡食十起
中夜牀雲埋長安日魂夢不敢驤茂苑富山水結廬余
所嘗我欲放船下卜鄰俯滄浪耦耕種秫田共掃三逕

荒頭白青山裏長歌樂歲觴

承天寺

宿雨洗蒼骨峰巒發新秀
尋幽躡竒蹤騰踏衆山囿
層林鎖巖隈突兀見危構
空高望浮黎靜聖逼靈鷲
我來風雨秋白露欲昏
晝但聞百川赴鳴玉
瀉寒竇岳示閔嶠
峨路絕不得造攀緣
仰脇息坐石俯長溜
帶露摘山芑披榛覓仙
耐山光晚逾清雲壑若
相授終期爛漫遊陽
鳥欲回味更約十日
留之子緩蹄輶

法王東庵

吾宗丘壑資耿耿抱幽獨結構祇洎家縈迴轉巖腹前
川布黃金合嶂來蒼玉步出覺華天乘凌眩生目雲間
起層林林際縣高屋斷砌滴疎泉微蹤隱深木堂空貝
葉昏苔盛半堦綠朱幡久不來哀猿響秋谷

秋居雜咏 二首

青春背我去白日不吾謀霜飈驚草木寒威戒衣裘寓
形復幾時四序忽一周世路伏劒戟中懷孕螟螣營營

事長久顏齡如置郵丘園倘未卜悟悅心自休

窮秋雜花遠春此霜下傑明金委珞瓔寶璐綴環玦依
依風轉蘭皓皓日穿雪苦無天冶姿不受衆目悅銜觴
泛其英攬之腸為結誰能踵高門持以浣中熱

宿揚州城外

舟行遠城郭缺月疎林杪窈窕一溪深微茫衆星小忘
言對詩書適意親魚鳥幸此絕紛華行歌閱昏曉

遊黃蘗寺

苦為捫蘿行正坐愛山癖振衣雲中樹洗耳泉上石稍
尋優鉢林偶傍瞿曇宅溪橫走羊腸山轉迴龍脊兩難
伴攜筇二老共飛錫望迷落葉秋坐斷蒲團夕雲歸繞
窗明香盡出簷碧希聲發巖竇妙觀生牆壁塵緣掃不
開勝事成今昔

行路難

江心蟠石蒼虬立山激江流浪頭急風昏月暗魚龍愁
電掣雲奔鬼神入船頭星斗天為低夜潮生寒洲渚移

鳴舷鼓柁驚楚子危檣遠纜號吳兒篙師咄咄自相語
明朝扁舟繫何許半月江行十日風寸步家山隔秦楚
黃衫年少金雕鞍日高華屋春夢殘插花走馬咸陽道
世上空嗟行路難

虞仲通判以溪聲名軒約同賦

山根出泉瀉鳴玉上有蒼崖擎佛屋無風水石自撞觸
不盡潮音發寒谷宰官豈是雲間陸舊識南泉生處熟
當軒大榜與名目平地重翻偃溪曲曲中時轉三妙語

一聲音談佛祖喧
喧噫視十方鼓萬壑風雷送煙雨
此聲不屬聞中取
六鑿相攘竟誰主
後來紛紛何足數
五乳峰頭曾賺舉
山翁有耳百不聞
團蒲曲几窮朝昏
何時沿溪掬寒綠
掃葉煎茶睡初足

遊龍潭

秦山破碎天上來
女媧仙去空崔嵬
中縣鳴玉三千尺
下有百仞青銅開
居龍變化出噓吸
雨暗雲昏鬼神入
我來坐石秋水間
雲影扶疎落空濕
浮丘容成不可俟

摩挲青壁著名字兩翁下遊會有時訪我鍾陵五松寺

山行遇雨

滄溟四乾青虬立碧雲摩霄高嶺岷六丁夜挽天河傾
石骨無塵露蒼濕長風吹雨不成絲飛鞚衝山帶煙入
羲和回馭還青冥布穀催耕喚春急

獨宿昭亭山寺

山寒六月飛霜雪樓殿夜深鐘鼓歇琅玕無風萬戟閒
屋角明河掛天闕龍牙七尺玉壺氷炯炯神清夢不成

可憐幽絕無人共卧看雲頭壁月生

發光林寺

朝發光林寺崎嶇渡復攀
樞衣綠翠濕側足下蒼頑
急雨欲平澗斷雲時見山
祇應超勝地行路不知艱

久雨阻遊昭亭有作

浪跡隨方寄窮途觸事諳
雨逢春甲子江滿地東南
客鬢霜前落詩情酒外酣
上方愁獨往藜杖許同參

春日雜詠 二首

幽栖足春事晴日苦相催
屐齒穿沙穩筇鬚礙竹回
光風初轉蕙殘雪欲欺梅
自是經過少柴門日日開
二月忽已破一春彊半過
提壺工喚客布穀巧當歌
得酒先愁盡惜花翻恨多
逢辰不為樂明日復如何

池亭詩月

輕雷不成雨風砌旋捲牀
山亂雲行曲樓高月路長
柴門非故國戎馬尚他鄉
笳鼓悲清暝關河思不忘

散策

散策北岡路牛羊歸徑深水窮人小立山靜客微吟點
點稻花雨團團榕葉陰田翁罷爭席明日共幽尋

與公序避暑石盎方晝欲寢聞林間禽鳴甚樂因
得小詩

一林啼鳥不知名應怪山翁此地行化蝶與周俱是夢
遊魚知我久忘情胷中丘壑真餘事世上功名畏後生
但得盈樽供自酌何妨人境卧淵明

渡橫溪

百尺滄浪兩岸沙
肩輿徒步步歌斜
溪聲猶帶夜來雨
山色漸分雲外霞
岸曲斷林開鳥道
水邊疎竹近人家
塵埃何處尋真境
試逐寒流認落花

次韻學士兄富陽道中

長江送客靜波瀾
路入回溪第一灣
石瀨橫陳潮力減
風檣圓轉櫓聲閒
驅除方寸無窮事
領略平生未識山
自笑疎慵似中散
政宜寥落水雲間

德甫知丞過筠莊谿亭為待月之會戲呈席上諸

友

載酒何人過子雲傳呼雞犬亦驚奔門無車馬苔侵逕
坐近池臺竹覆尊好月邀人留晚照疾雷催雨過前村
獨醒楚子真多事共醉愚溪百尺渾

自連江赴守鄱陽黃原道中作

海角三年一夢成北來重聽偃溪聲凝雲帶雨留愁住
茂樹隨山送客行秔稻沿崖畦上下茆茨枕谷路縱橫
莫從馬腹消雙髀此地真堪老此生

題趙幹江行初雪圖

瓜步西頭水拍天
白鷗波上寄長年
箇中認得江南手
十里黃蘆雪打船

朱松

字喬年徽州婺源人
中進士第胡世將謝克家薦
之除祕書省正字趙鼎都督川
陝荆襄兵馬招松為屬辭之
鼎再相除校書郎遷著作郎
再用常同薦除度支員外史
館校勘歷司勳吏部郎秦檜
決策議和松與同列上章極
言其不可檜怒諷御史論松
懷異自賢出知饒州未上卒
子熹

題蘆雁屏

征鴻坐何事天遣南北飛蕭然如旅人無情自相依孤
葦吹欲折秋風不勝威冥冥一高雁空費弋者機寒聲
落煙渚相應不暫違嗟余識此情納手空歎歎

於潛道中

山行厭犖確理策扶歌危綠野三兩家一息知可期冉
冉層林端炊煙裏晴暉其民豐且樂恐是太古遺那知
都邑間百索困鞭笞繁華今何有半作道傍羸

度芙蓉嶺

幽泉端為誰放溜雜琴筑山深春未老泛泛浪蘂馥娟
娟菖蒲花可玩不可觸枯根盤翠岸老作蛇蚓蹙蹙裳
踏下流濯此塵土足何當餌香節淨洗心眼肉餘功到
方書萬卷不再讀晚歲窮名山靈苗縱穿斲

坐睡

坐久睡屢兀手失耒了書清風脫然至心醒得我娛起
看孤隙光了不移錙銖云何短夢中萬境生須臾嗟彼
市朝子百巧營其軀安知非夢境過眼滅無餘

戲答胡汝能

我生苦中狹與世杳鑿垂平生素心人耿耿不滿懷汝
能伯始後遊世如嬰孩相逢握手語便作塤箎諧時時
笑謂我如子患未涯執古以稽今求合誠難哉涉世幸
未遠子車尚可回不見山巨源雍容居鼎台寥寥嵇中
散絕交良可哀

謁吳公路許借論衡復留一日戲作

幽獨不自得駕言款齋廬殷勤主人意投轄恐回車世

途早已涉此去將焉如惟憂酒錢盡使我詩腸枯會合
曾幾何可復自為疎更當留一夕帳中搜異書

書窗對月

天公自厭雨一夕開寒晴霜風淨曠野搖落有餘聲饑
鴉得林靜霽月縈窗生故人千里餘濁壺誰與傾遙知
勸影醉共此通夕情明年溪上路來餉雨中耕

春日與卓民表陳國器步出北郊

灼灼桃吐華濯濯柳垂縷芳菲挽人出春工乃如許嗟

余閉門久佳節過不數伴擬山陰勝詩作斜川語誰言
一尊酒妙指合千古歸來讀殘書耿耿霜月苦空餘流
落心三歎非吾土

和謝綽中觀瀾亭

方塘灔宿漲曲澗來飛湍光涵蔚藍天瀕洞碧玉寬小
亭塵土外瓦影浮朱欄霜渚寫秋色煙林養漁竿佳人
秋霞衣皎皎明月冠欲濯且無塵隱几得妙觀海若眩
河伯等在蝸角端那知坳堂上盃水生濤瀾

答保安江師送米

不見道人久天涯歲云除朝來食指動忽接送米書念
師折脚鐺五合未省餘雖無覆餗禍尚有乞食逋云何
憐孤客日受饑火驅未曾貸監河矧宵索缺奴嗟余事
筆耕輕棄南畝鋤恩煩方外客此計良已疎何時事粗
了歸葺五畝居生涯寄緯竹豈即非良圖

久雨短句呈夢得

身閒書有味吏傲俗不親小窗據物表掃盡心眼塵令

尹垂珠玉敲門喚行春作意向芳物吾車曾未巾愁陰
入病骨鳩婦聲亦嗔冥冥三日雨桃李迹已陳眼中醉
鄉路風味良獨醇流光不容玩尺璧何足珍漓俗益可
厭願言勤問津

菖蒲

東山在眉宇未到心鬱紆流泉撞哀玉清冽生菖蒲聞
有嬋娟子棄家來結廬窈窕雲霧窗參差冰玉膚絕粒
餌香節仙姿清且腴邇來隱身去冷落愁臞儒靈方無

由乞石斗移根鬚相看意已消何必見子都

中秋夜雨

秋雲定何心忍翳今夕月尚嫌微點綴況乃都漫滅他
時任氛霾此際望清澈倦投衲子窗竹雨聽騷屑對牀
不成夢有酒那能設螢飛矜意氣蟲語轉幽咽心知層
陰表皎皎玉輪潔何當凌倒景徙倚玩飛轍

曉過吳縣

舟行有嚴程越國常曉發雙櫓兀殘夢起坐窺落月人

家岼野水霧雨籠
邃閣遙憐瑣窗人
歌枕聽嘔軋

秋懷四首

秋風未幾日我髮白已多
千林了未覺奈此一葉何
安坐惜流光斜盼寄庭柯
寒蟲獨何者唧唧夜自歌

月林疎愈明露草淨可拭
飛飛螢遶照軋軋蟲自織
移燈檢書讀千載如經夕
微言契夙心妙解失陳迹
文章事雕琢回視真兒劇
世無揚子雲此理誰見直

林皋片葉脫靜士最先知
自我抱茲獨悠然星氣馳
乾

坤一逆旅鼎鼎竟何為枯榮俯仰中兒輩浪自悲青雲
渺難必白髮不可辭得飽良已泰雨蛙瓜芋肥

市朝富危機匹夫死憑河何如狎鷗子烟雨一滄波行
藏各有趣不在相詆訶我師陋巷人千古冠四科

送志宏西上

九州眼一槩餘子真瑣瑣獄立培塿中喜此高岷碛如
公我輩人取友亦到我揮毫賦垂天風雨卷蓬顆相期
八表遊未覺夙心左解龜醉江閣酒面山月墮起瞻帝

鄉雲感歎不成坐何須飛霞佩自辦凌風舸瀛州渺溟
渤萬里一掀簸

月桂花

窗前小桂叢著花無曠月月行晦朔周一再開復歇初
如醉肌紅忽作絳裙色誰人相料理耿耿自開落有如
貧家女信美乏風格春風木芍藥穠艷傾一國芳根雖
無恙歲晚但枯枿

飲梅花下贈客

憶挽梅花與君別終年夢掛南臺月天涯谿上一尊酒
依舊風枝舞香雪高情絕艷兩無言玉笛冰灘自幽咽
且當醉倒此花前猶勝相思寄愁絕

淮南道中微雪

密密雲陰合斜斜雪態妍似欺春力淺故傷客愁邊宿
鳥投村暝寒梅抱蘂鮮無人命尊酒清絕裊茶烟

東陽社日泛舟觀競渡

誰喚思家客來為蕩槳嬉鬢華羞照水雨意解催詩疊

鼓飛文鷁香鬟出短籬醉歸真夢覺猶憶湔裙時

解返舟

上國經年客春流一櫂波已醒離帳酒猶記客亭歌野
枕殘歸夢霜衾擁獨哦蓬窗橫落月作意傷人多

西湖泛舟

望湖樓下照衰顏羞見塵埃兩鬢斑風艇縱看山轉側
烟堤儘逐水回還喚人歸去城鐘急觸處相親嶺月彎
不用新詩摹絕境定知長到夢魂間

贈言命張生

俛仰塵埃的自羞
稍看寒餓復誰憂
小兒造物巧相戲
窮鬼逐人殊未休
我所不知煩子算
世如無取更何求
服箱挹酒真么麼
那用區區問斗牛

贈僧

知有叢林特地過
幅巾迎笑出巖阿
杖藜同覓牛羊路
濯足來分鷗鷺波
豈不倦遊貪斗粟
坐令歸思動漁蓑
他年會有相逢日
稍食吾言聽子呵

答卓民表送茶

攪雲飛雪一番新
誰念幽人尚食陳
髯三生玉川子
破除千餅建谿春
喚回窈窕清都夢
洗盡蓬蓬渴肺塵
便欲乘風度片水
卻愁狡獪得君嗔

答人留別之什

家在大江東
復東去君一舍
碧流通邠知臨水
登山處
同寄飛蓬斷梗中
愁絕盃中千里月
夢縈江上一帆風
只今且作須臾意
更典雲裘醉小叢

招友生

雨收天氣欲清明猶有餘寒在粥餠馬隊客勤貪晝永
鱸堂人病想身輕讀書有味蘼鹽好對境無情夢寐清
欲話此懷須我輩一來蠟屐伴春行

送蘭廷彥之衡州

墻東新徑去年開二老扶筇便往來數面何曾三日別
離懷都寄十分杯客亭繫馬梅爭落官舍裁書雁欲回
見說雲霄有知己邨須卜築向蒿萊

曾幾

字吉甫其先贛州人徙河南府幼有識度母死蔬食十五年入太學有聲用兄弼蔭授將仕郎試吏部優等賜上舍出身擢國子正靖康初提舉淮東茶鹽高宗即位累遷浙西提刑坐兄開與秦檜力爭和議牽連落職僑居上饒七年檜死起知台州以賀允中薦得召對稱旨授秘書少監歷敷文閣待制乾道二年卒年八十
二謚文清有文集三十卷

嶺梅

蠻煙無處洗梅藥不勝清顧我已頭白見渠猶眼明折
來知韻勝落去得愁生坐入江南夢園林雪正晴

鄧帥寄梅併山堂酒

甓社湖邊路詩筒得報回舊時雲液酒新歲雨肥梅不
是園官送真成驛使來鬢毛都白盡更著此花催

謝人送壑源絕品云九重所賜也

三伏汗如雨終朝霑我裳誰分金掌露來作玉溪涼別
甌輦炊飯小爐深炷香麴生何等物不與汝同鄉

述姪餉日鑄茶

寶鑄自不乏山芽安可無子能來日鑄吾得具風爐夏

木轉黃鳥僧窗行白駒談多喚坐睡此味政時須

次韻雪中

積雪何所待冷雲終未開有時聞瀉竹無路去尋梅只
欲關門卧誰能蕩槳來辟寒須底物正合麴君才

種竹

近郊宜竹樹手植滿庭隅餘子不足數此君安可無風
來當一笑雪壓要相扶莫作封侯想生成鄙木奴

巖桂

栗玉粘枝細青雲剪葉齊團團巖下桂表表木中犀江
樹風蕭瑟園花氣慘淒濃薰不如此何以慰幽棲

即事

似病原非病求閒方得閒殘僧六七輩敗屋兩三間野
外無供給城中斷送還同行木上座相與往茶山

清波雜志云宋高士寓上饒者則有徐師川呂居仁
鄭顥道曾宏父吉父諸公嘉祐中狀元劉焯嘗欲編
玉溪唱酬集以誌其盛因循未成焯按呂本中字居
仁紹興間官中書舍人秦檜既相私有引用意本中
封還除目檜隨風御史劾罷之因屏居茶山寺以歿
鄭望之字顥道彭城人少有文名官吏部侍郎弟資

之字深道亦吏部侍郎僑居上饒扁其室曰寓屋師
川名俯詩見前卷居仁於南宋稱雅宗其全集不傳
僅從石倉詩風中錄得數首而已宏
甫名開與鄭君詩皆無從見惜哉

長至日述懷兼寄十七兄

老來逾覺白駒忙眼看重陽又一陽
心似死灰飛不起
愁如寒日短初長厭看賓客空投謁
強對妻孥略舉觴
回首山陰酬勸地應憐鴻雁不成行

壬戌歲除作明朝六十歲矣

禪榻蕭然丈室空薰銷火冷閉門中
光陰大似燭見跋

問學只如船逆風一歲臨分驚老大五更相守笑兒童
休言四十明朝過看取霜髯六十翁

謝人分餉洞庭柑

黃柑送似得嘗新坐我松江震澤濱想見霜林三百顆
夢成羅帕一雙珍流雲嘆霧真成酒帶葉連枝絕可人
莫向君家樊素口瓠犀微齟遠山顰

此詩一作謝宏父餉柑然宏父其兄也不應有君家句

荔子

異方風物鬢成斑
荔子嘗新得破顏
蘭蕙香浮襟解後
雪霜膚在酒酣間
絕知高韻傾瑤柱
未覺豐肌病玉環
似是看來終不近
寄聲龍目漫追攀

避寇遷居郭內風雨淒然鄭簡道餉酒

烟雨昏昏二月梅
全家避寇寄城隈
欲尋碧落侍郎去
遽沐青州從事來
令我妻孥爭洗盞
想公伯仲正傳杯
安能鬱鬱久居此
且傍茶山松逕回

雪作

卧聞堆霰却無聲起看堦前又不能一夜紙窗明似月
多年布被冷于冰履穿過我柴門客笠重歸來竹院僧
三白自佳清亦好諸山粉黛見層層

雪中登王正中書閣

對雪誰堪語登樓似欲仙人家修月戶丈室散花天峰
疊鈎簾外江橫隱几前寒深落雁渚清集釣魚船解病
從摩詰消愁得仲宣展書明細字烹茗濕疎烟月好還
同夢詩成已下弦明年倘相憶為一到關邊

宋元詩會卷三十五